



Antara pameran yang terdapat pada hari terbuka kolej CD

Hari Terbuka Sulung Kolej CD

oleh: Mohd Said Bin Odeh

JUMAAT, 18 APRIL – Sempena dengan hari Terbuka Sulung Kolej CD, Universiti Malaysia Sabah (UMS) telah melaksanakan pelbagai aktiviti bersama para pelajar yang diadakan di Cafe Kolej Kediaman CD.

Sambutan hari terbuka yang bermula Khamis dan berakhir pada Ahad ini, diadakan bertujuan untuk mengukuhkan hubungan di kalangan siswa-siswi yang berasal dari pelbagai latar belakang yang berbeza.

Di samping itu, ia juga diadakan untuk memberi pendedahan kepada siswa-siswi tentang

pengurusan program di kolej kediaman atau universiti.

Antara kandungan hari terbuka ialah ekspo keusahawanan, kempen derma darah, “UMS Got Talent”, pembukaan rasmi taman mini, demonstrasi keselamatan dan perarakan oleh badan-badan unit beruniform, permainan dan seminar oleh Jabatan Belia dan Sukan.

Upacara pembukaan akan dirasmikan oleh Menteri Kerajaan Tempatan dan Perumahan Sabah, Datuk Seri Panglima Haji Mohd. Noor di Dewan Serbaguna Kolej CD pada hari Ahad ini.

Kolej CD juga akan menganjurkan Hari Siswi yang akan menampilkan pelbagai aktiviti menarik. Program yang diilhamkan oleh Ketua Kolej Kediaman, Dr Mohamad Nizam Nazarudin bertujuan untuk memberi peluang kepada pelajar siswi untuk mempamerkan bakat dan kemahiran mereka melalui pelbagai aktiviti seperti susunan hantaran dan pertandingan memasak.

Hari Siswi ini diadakan bertujuan untuk mendedahkan mereka kepada pelbagai teknik amalan penjagaan kesihatan dan gaya hidup sihat melalui ceramah kesihatan, kecantikan dan memasak bagi memeriahkan hari tersebut.

Hari Siswi akan dibuka secara rasmi oleh Menteri Pembangunan Masyarakat dan Hal Ehwal Pengguna, Datuk Hj. Jainab Datuk Seri Panglima Hj. Ahmad Ayid pada hari Sabtu ini.